

30/09/1997

Kilang tidak hirau arahan henti operasi

KUALA TERENGGANU, Isnin - Kebanyakan kilang bata dan papan di negeri ini tidak mematuhi arahan Perdana Menteri, Datuk Seri Dr Mahathir Mohamad supaya menghentikan sementara operasi, terutama kilang yang banyak mengeluarkan asap.

Tinjauan Berita Harian di Jalan Kuala Terengganu-Kelantan, Jalan Gong Badak dan Jalan Kuala Berang mendapati kilang terbabit terus mengeluarkan asap tebal yang dapat dilihat dari jarak kira-kira 300 meter dari jalan utama.

Ada pihak kilang yang mendakwa tidak diberitahu oleh Jabatan Alam Sekitar (JAS) mengenai arahan itu, malah tidak pernah dilawati oleh JAS untuk diberi penerangan mengenai tahap pengeluaran asap yang dibenarkan.

Pengarah JAS negeri, Jamaluddin Mahmud Abu Bakar ketika dihubungi, menafikan pihaknya tidak pernah membuat pemeriksaan ke kilang papan atau kilang bata seperti yang didakwa pemilik kilang terbabit.

"Kita sudah menjalankan pemeriksaan ke atas beberapa kilang di negeri ini dan adalah tidak benar untuk menuduh JAS tidak melakukan pemeriksaan," katanya ketika diminta mengulas dakwaan itu.

Bagaimanapun, katanya setakat ini hanya sebuah kilang dilawati JAS, Bina Bricks di Jalan Kuala Terengganu-Kelantan sudah menghentikan operasi mereka secara sukarela.

Mengenai operasi sebuah kilang papan di Jalan Gong Badak, di sini, beliau berkata, pihaknya akan mengadakan pemeriksaan ke kawasan kilang terbabit.

(END)